



A disin che cuant che tu pierdis lis clâfs di cjase bisugne cambiâ la sieridure, ma Mariute, la dî che Berto al jere lâf vie, cu la valîs in man, sbatint la puarte e paragonant al Signôr une schirie di bestiis e besteutis, e veve fat une vore, ma une vore di plui.

«Siore? Ise sigure che i coventi propite chest prodot?» i veve domandât il marcjant, lant adiriture cuintri dai siei interès. Ma la femine no veve vude nissune esitance e i veve dât ben plui di cualchi mê, sparagnât tai agns, per comprâ il sisteme plui tecnologjic e avanzât in materie di puartis rinfuraçadis e argnagns cuintri lis robariis. Si jere fate istruî sul ricognossiment otic dal voli e su chel des improntis digjitâls - di meti in vore tal stes timp - e dopo di chel, cuntûn sunsûr di sodisfazione, si jere sierade chê puarte impenetrabile daûr de schene. Al veve dome di provâ a tornâ in cjase, chel porco di Berto!

Giulietta, Dyane, Flavia, Fulvia, Serena, Fabia, Felicia, Clio... Cun tropis altris feminis i vevie fat i cuars, chel maladet?! E podopo? Al veve vude parfin la muse rote di inventâ scusis! Al veve voie di convincile che chei li segnâts su la sô agjende a fossin ducj non di machinis! Puâr cocâl che nol jere altri, e veve pensât Mariute, braurose de sô valente e irevocabile decision!

di Rafaël Serafin

Titul: Sierâ la puarte dopo che al è scjampât il purcit